

2Sam 11,1-4a.5-10a.13-17

Segundu livru Samuel nian ko'alia kona-ba David nia Reinu no iha tempu hebreu sira nian, livru ida ne'e, hamutuk ho livru primeiru forma livru ida de'it. 2Sam hahú ho Liurai Saul nia mate no hatudu buat hotu ne'ebé David halo atu sai Liurai eh, liuliu, atu soia tu sai liurai (kf kap. 1 to'o 8).

Husi kap. 9 to'o 20 bele hetan problema oinoin ne'ebé liurai David hasoru, la'ós de'it kontra funu-baluk sira, maibé mós kontra ninia oan sira no mós ninia an rasik.

Livru ida ne'e hakerek kona-ba Liurai David ho lialoos: hatudu nia nu'udar ema ho fiar kle'an, matenek, aten barani, laran luak no mós haraik an, maibé mós la subar ninia defeitu sira eh ninia salan sira, liuliu iha kapitulu ne'ebé ita sei lee. Maski nia defeitu sira ne'e, Liurai David sai "Liurai ideál" ba povu Israel, ne'ebé la hetan liurai ida tan hanesan nia no foti nia nu'udar modelu atu sukat liurai sira seluk.



Objetivu testu nian

Akontesimentu ida ne'e mosu bainhira Liurai David manán ona nia povu nia fuan: ninia matenek, ninia kbiit, ninia simpatia halo povu tomak hadomi nia. Buat hotu parese la'ós loos ona iha Reinu laran, problema mosu de'it husi funu-baluk sira ne'ebé hela besik no kontinua halo funu hasoru Israel.

Testu hakarak hatudu katak bainhira buat hotu la'o loos de'it, ita-nia hakaran no ita-nia kbiit sai fraku, nune'e fasil liu atu monu ba babeur sira. Maibé testu la para iha ne'e de'it, tanba hatudu oinsá husi sala ki'ik ida (David la partesipa ba funu, hela iha Jerusalém bainhira nia emar sira sei funu, kuaze hatudu katak nia "baruk" atu kontinua moris nu'udar funu-na'in), se ema la konxiente, bele monu ba sala sira ne'ebé sai boot ba daudaun, to'o oho ema ida.

Ita sei la lee oinsá istória ida ne'e ba oin, maibé Maromak haruka profeta Natan atu halo David sai konxiente kona-ba ninia salan no David, ne'ebé Na'i nia ema tebes, arrende, rekoñese ninia salan no konfia iha Maromak nia laran sadia (tradisaun fiar katak David hakerek salmu 50 depois de esperiênsia ida ne'e).



Leitura testu nian

irvito all'ascolto Hanesan enkontru uluk kona-ba Bíblia, ita bele lee pasajen husi Livru 2 Samnuel nian ho esplikaun badak ruma ne'ebé Bíblia ekumenika fó no iha sorin bele hetan pasajen seluk Bíblia nian ne'ebé iha ligasaun ho versikulu sira ne'e.



¹Hahú iha tinan ne'ebá, iha kedas tempo ne'ebé liurai sira sai atu ba funu^a, David haruka Joab ho nia ulun sira no Israel tomak, hodi hadau tiha Amonitas sira rain no hale'u tiha Rabá. Maibé, David hela tiha iha Jerusalém. 1Cr 20,1

²Iha loraik ida, David hamriik housi nia toba fatin, ba pasiar iha nia kadunan nia oin.

Hosi ne'ebá nia hare feto ida haris hela; feto ne'e furak teb-tebes. ³David buka hatene sê mak feto ne'ebá, no ema sira dehan ba nia katak, "Betsabé, Elião nia oana feto,

Urias be ema hitita ne'e nia feen".

⁴Nune'e, David haruka ema sira ba bolu nia mai. Nia mai duni, hafoin fila hikas ba nia uma. Betsabé foin hotu ninia ritu purificação nian.^b

⁵Haré katak nia ko'us ona, haruka fo hatene ba David: "Ha'u isin rua ona". ⁶Nune'e, David haruka fo hatene ba Joab hodi dehan nune'e: "Haruka Urias be ema hitita nian ne'e mai". ⁷Joab haruka duni Urias ba David.

Wainhira Urias to'o, David husu ba nia kona ba Joab, kona ba liman kroat sira no kona ba funu. ⁸Hafoin dehan ba nia: "Tun ba ó nia uma hodi fase tiha ó nia-ain".

Urias sai tiha husi liurai nia uman, hafoin, liurai haruka hahan housi nia meza ba nia. Gen 38,24-25

⁹Maibé, Urias la tun ba nia uma^c; toba hela iha odamatan kadunan liurai nian, hamutuk ho liurai nia tan sira seluk.

¹⁰Sira haktuir ba David hodi dehan: "Urias la tun ba nia uma".

Iha loron tuir mai, ¹³David konvida nia atu ba han-hemu ho nia no fó lanu tiha nia.

Maibé, iha kalan, Urias la tun ba nia uman; sai, ba toba tiha ho atan sira seluk liurai nian.

¹⁴Iha loron tuir mai, iha dadér, David hakerek tiha Surat ida ba Joab, hodi haruka surat ne'e housi Urias. ¹⁵Iha surat ne'e, dehan: "Tau Urias iha oin, iha ne'ebé iha funu maka'as, no labele tulun nia, atu nia bele kanek no mate".

¹⁶Joab ne'ebé ataka hela sidade, tau tiha Urias iha fatin ne'ebé ema funu-na'in sira hela ba. ¹⁷Nune'e, ema sira sidade nian sai, funu hasoru Joab. David nia emar sira balun mate, iha sira nia leet mate mos Urias ema hitita nia ne'e.

^a Ha tempu ne'ebá povu sira halo funu bainhira tempu udan nian para ona, katak maizumenus fulan marsu.

^b Hodi temi "ritu purificação nian" autór halo leitór komprende tansa Batsabé hariis (Kf Lev 15,19-30) no mós konfirma katak oan ida ne'e mak David nia oan, tuir koñesimentu biolojia tempu ida ne'ebá nian.

^c Israel nia oan sira, molok ba funu, respeita regra sira "laran moos nian"; entre regra sira ne'e iha mós abstinéncia seksuál

1Liurai 21,8-9;

2Liurai 10,1



Pontu ruma ne'ebé ita aprende husi pajina ida ne'e:

- Respeitu ba ema, ba ninia dignidade no ninia moris mak sinál ida ne'ebé respeita Maromak no ninia Lei.
- Maski Liurai David ema fiar na'in no ema ne'ebé Maromak hadomi, nia mós hetan babeur: maibé, iha momentu ne'ebé nia sente domin ida ne'e nu'udar buat ruma ne'ebé nia «merese», nia la koxiente ona kona-ba salan ne'ebé nia halo hasoru Maromak, tanba nia hanoin katak nia to'o ba ninia an no la presiza ona Maromak.
- Bainhira ema lakon sentidu salan nian, buat hotu, ki'ik eh boot, lakon valór hotu, bele sala to'o oho ema ida maibé ohodór ne'e la «sente» buat ida no nia hahalok sira nia consequénsia sai «problema» ne'ebé nia presiza resolve.

Amo Papa Francisco dehan: «David sai ninia salan ne'ebé la rekoñese nia atan. Bainhira ita la hatene ita-nia an rasik no ita-nia limitasaun, ita la bele experimenta grasa ne'ebé mai husi Maromak. Ita sei la hetan salvaun husi ita-nia an rasik, no mós husi ita-nia matenek, maibé husi Maromak nia grasa no treinu ne'ebé ita halo loron-loron ho grasa ida ne'e.»